

光啟雜誌

人生三大問題

上海土山灣印書館發行

N° 141-8

光啟雜誌

人生三大問題

上海土山灣印書館發行

N° 141-3

7000 5-36

MÉLANGES DE ZI-KA-WEI

N° 13

VITÆ HUMANÆ

TRIA PRÆCIPUA PROBLEMATA

3^a editio



上海主教惠

一千九百三十六年

重准

三
版

BUREAU SINOLOGIQUE
DE ZI-KA-WEI

光 啟 社

IMPRIMERIE DE T'OU-SÈ-WÉ

1936

人生三大問題

第一問題 入世之由來

或有問於予者曰：夫人莫不由父母而生，則父母者，實爲吾人入世之由來。乃古聖經書，則曰天生蒸民，口頭俗語，則曰天生天養，豈人入世之由來，理應歸之於天耶？

予應之曰：吾子所說之天，乃指肇造天地人物之主宰而言，卽古聖先王寅畏欽若之天，而非輕清上浮有形之天也。古儒以天借稱主宰，與後世以朝廷借稱帝王無異。宋儒不明此義，悞以天卽是理。夫理爲虛體，不能自立，附屬於物者也，而可謂爲造生人物之主乎？今已知所說之天，非形色之天，非虛體之理，乃是造物之主宰，則人爲天生天

養之義，思過半矣。請申其說，以明吾人入世之由來。

生我者父母也，生父母者祖父母也；由祖而曾而高等而上之，以至於人類之第一父母；夫既謂爲人類第一父母，則非更有父母以生之，其由何來，豈非天生天養乎？人類之第一父母，既爲天生天養，飲水思源，可謂吾人非天生天養乎？且以人生人，乃造物之天所制定一種之妙用，其化生之工，仍是天工，而非人力也。夫人成胎之後，其肢體如何而造就，其臟腑如何而構成，爲父母者，未能參預其玄奧，其製作之奇異，運化之靈敏，皆此造化之天獨具之神工，則此造化之天，實吾人入世之由來，而天生天養之義，不得因由父母所生而疑之也。

或曰：據上所論，已知此天生天養之天，非形色之天，非虛體之理，乃是造物之主宰，然此造物之主宰，是否卽世俗所稱之仙佛菩薩，抑

別有名稱歟？予曰：此造物之天，乃至尊無對之神明，爲天地人物之元始，世俗之仙佛菩薩，皆生於天地之後，乃是受造之人，絕非造物之主，何能僭竊此尊號？惟詩書所稱之蕩蕩上帝，惟皇上帝，其庶幾矣。若吾聖教，以此至大之神明，本無名之可擬，姑借天以示其大，稱主以顯其尊，名之曰天主，以別於佛老所稱之上帝，及流俗所指之形天。然則天生蒸民之天，天生天養之天，實卽天主之別號，而天主者，實爲吾人入世之由來，吾人實爲天主所生養，應無疑義矣。

第二問題在生之要務

或曰：吾人入世之由來，旣聞命矣，敢問人生之要務安在？予應之曰：大哉吾子之問也！夫人之夙夜思慮，終歲勤勞，無非爲

名利身家計耳，人生處世之重要職務，豈無有過於此者乎？吾有以知其必不然也。人生朝露，七十古稀，以此短促之時日，不求真正之要務，亦大可哀矣！然則真正之要務，果安在哉？曰在乎尋源報本耳。吾人既知天主爲造生人物之主宰，爲人入世之由來，可謂尋獲根源矣；至於報本之義，則在信認敬愛此生養吾人之天主也。心思無疑謂之信，語言証實謂之認，敬之如聖君，愛之如慈父，寅畏修省以遵其誠命，欽若允恭以結其歡心，入其所立之教，則言規而行矩，修其所佈之道，則心正而意誠，如是始可謂善盡報本之能事，人生當然之要務，孰有過於此者哉？若夫崇奉人物僞神爲造世之主，而不敬愛真主者，則是叛本離源，自絕於天地之大君，萬民之大父，不忠不孝，將來難逃身後之永罰。蓋尋源報本，實爲人生最大之要務，若竟放棄不顧，而惟富貴逸樂

之是圖，則幾與無靈明者相似，而自喪其人格矣，悲夫！

第三問題身後之歸宿

或曰：人死如燈滅，有何賞罰之可言？今日不敬造物真主者，難逃身後之永罰；豈人身死之後，靈魂別有所歸宿，而受善惡之報耶？

予應之曰：人死如燈滅，乃流俗無知之鄙語，靈魂永生不死，乃古聖經典之正義。書曰：茲因多先哲王在天。詩曰：文王在上，在帝左右。若身死魂滅，安得在上在天在帝左右乎？且巨奸大慝，終身富貴，仁人義士，畢世困窮者，數見不鮮，若身後無善惡之報施，則書所謂福善禍淫之天道，果安在哉？夫肉軀爲有形之體，易受感傷，故可致於死，靈魂爲無形之體，不受侵害，故永生不滅。在世知根報本，敬主守誠者，身死之

後，其靈魂必登天堂，而享永福；在世忘本爲非，不敬天主者，身死之後，其靈魂必墮地獄，而受永苦。從此可知身死靈魂永遠之歸宿，不外天堂與地獄兩途耳。此乃至理，可徵之正道，而非無稽鑿空之迷信。吾人應猛然醒悟，改過守誠，以避地獄，入教敬主，以趨天堂，獲福無疆矣！

予與或人問答之言如此，因其爲人生重要問題，故錄之以爲研究天主教真道之起點。如欲聞其詳，請閱教中聖教理證，天主教三山論學，天主實義，真教自證，答客問，七克真訓，理窟等各種書籍可也。

24

80002/